

Noic nanderac tarang San Pablo müüch minipilan Teat Cristo moncül tiül Filipos

FILIPENSES

**Altiül manchiüc Teat
Pablo, atepeay nejiw**

1 Xique Pablo naquiiüb Timoteo, sarangan najiüt ocueaj Teat Jesucristo, satepeayiün meáwan minipilan Teat Cristo Jesús moncül tiül cambaj Filipos. At satepeayiün meáwan montangtang monajiüt y diáconos tiül minipilan Teat Cristo. ²Tanaámb ich mambeol icon Miteatiiüts Dios at Teat Jesucristo müüch icon mejiüran monajneaj.

**Pablo ataag orar wüx
minipilan Teat Cristo**

³Xique süüch gracias Teat Dios wüx leaaw ximeaats icon. ⁴At meáwan nüt wüx sasaj Teat Dios wüx icona, nfüngan apac ximeaats xeyay. ⁵Cos naw wüx aaga nüt tamelichaats marangaats najiüt nóiquian masajaats nipilan mayariw andeac Teat Cristo; ⁶sajaw naleaing Teat Dios nembeol icon meyariün andeac nej. Nej aton tanaámb apmambeol icon wüx aaga najneaj najiüt, leaw atüch a nüt mandilil Teat Jesucristo.

⁷Xique apac ximeaats wüx icona, sajiür icon lasta xeyay. Teat Dios ambeol meáwan icoots majlüyiiüts nóiquian, masey wüx sal tiül manchiüc, tengwüy wüx sajlüy niüng ajlüy monajiüt, alndom napiüng nguineay xique saquiaach nipilan aaga Najneajay Nanderac wüx Teat Cristo. ⁸Teat Dios ajaw xique xeyay sajiür icon lasta atnej xeyay ajiür icon lasta Teat Jesucristo. ⁹At satün ocueaj Teat Dios wüx icona, merjiürayon lasta xeyay. At satün mexoman imeajtsan wüx cuajantanej, mejawan nguineay netam merangan. ¹⁰Cos netam merriüjtan cuane najneaj, quiaj apmejlüyiün najneajay, ngo majlüy cuane apmesoiquian wüx nüt apmandilil Teat Cristo. ¹¹Teat Cristo apmüüch icon merangan cuajantanej najneaj. Wüx aag ayaj Teat Dios apmarangüch casa, apmanderac wüx nej xeyay najneaj.

**Wüxan salnapac sanarang
atnej andiüm Teat Cristo**

¹²Xecojow xechijquiaw, sandiüm menguiayiün meáwan leawa

samongoch, cos wüx aag ayaj naleaing xeyay teanderac wüx nguineay Teat Cristo awün asoet nipilan. ¹³Meáwan soldados leaw ajlüüiw ningüy, at pálwüx nipilan, lamanguiaiyw xique sal tiül manchiüc cos sandiüb Teat Cristo. ¹⁴Cos sal ningüy tiül manchiüc, pares xeyay minipilan Teat Cristo ngo mimboloj, ngo maxinguiaw mandeaciw wüx nej nganüy.

¹⁵Altiül monquiaach wüx Teat Cristo nind ajcüiyw majawüw xic cos andiümüw malombaranüw. Masey, cos álan tiül nejiw asajüw nipilan wüx Teat Cristo con omeajtsüw, ngome aleaic ambüw wüx. ¹⁶Naleaing ajcüwa leaw mondiüm manderac najneaj wüx ombasüw, ajcüw ayaj arangüw wüx omeajtsüw, cos andiümüw müjchiw mamix ximeaats wüx nganüy sal tiül manchiüc cam. ¹⁷Masey, cos alacas andeaciw wüx Teat Cristo nde ajneaj majawüw xic, ajawüw Teat Dios neyac xic nasaj nipilan nguineay lamawün asoetiüts Teat Cristo. ¹⁸¿Jow nganüy cuane ajiür aag ayaja? Masey altiül andeaciw con omeajtsüw wüx Teat Cristo, altiül ngwüy. Naleaing Teat Cristo tanaámb teanderac wüx nej; aag ayaj üüch mapac ximeaats.

¹⁹Apac ximeaats xeyay cos sawaw wüx itajcan orar, quiaj aaga Nangaj Espíritu ocueaj Teat Dios leaw Teat Jesucristo tüüch miün, nej apmambeol xic namongoch najneajay leawa naél sal wüx cam. ²⁰Xique nganüy leawa teanandiüm, malüy ngo naxing wüx nicuajind leaw teanarang, nandeac najneajay leaw netam nandeac nde nganüy

cam, at meáwan nüt alndom marangüch casa Teat Cristo, masey nganüy wüx salnapac, tengwüy alinoic nüt wüx lasandeow.

²¹Wüxan salnapac sandiüm narang meáwan leaw andiüm Teat Cristo; at wüx sanandeow, quiaj más najneajay sanajlüy. ²²Masey sitiül tealeámban aliün napac, quiaj alndom narang najiüt leaw andiüm Teat Dios; pues ngo najaw ngün sanarriiüd. ²³Xique ngo najaw ngün más najneaj, Cos noic sandiüm nandeow namb naquiüb Teat Cristo, aag ayaj najntsop ajneaj najaw a xique. ²⁴Alinoic aton leaw netam icon xeyay, aag ayaj malüy ngo nandeow, nacül ningüy wüx iüt tanaámb nambeol icon. ²⁵Pares sawaw naleaing sanacül ningüy wüx iüt alacas nüt naquiüb icon, para nambeol icon metangan wüx Teat Cristo, nüüch mapac imeajtsan xeyay wüx indüjpiün nej. ²⁶Sapiüng apmapac imeajtsan xeyay wüx sanajlüy naquiüb icon alinomb. Quiaj apmerangan casa Teat Cristo, cos lamambeol xic.

²⁷Nganüy aag agüy sandiüm nasaj icon: netam meyamban nguineay alndom mejlüyiün atnej apiüng aaga najneaj nanderac wüx Teat Cristo. Masey sanamb najaw icon, tengwüy ngo namb, xique sandiüm nanguiaiy icona tan iriümban mejlüyiün nóiquian wüx merangan leaw andiüm Nangaj Espíritu; tanaámb mendüjpiün nóiquian wüx aaga leaw lameajndiün meyajcan tiül imeajtsan, wüx tenguiayiün nguineay alndom meriowan wüx isoetiün. ²⁸Nde mermbolan mendüyiün jane ajcüiyw majawüw

icon, cos aaga leaw arangüw quiaj ajiuquich apmambüw tiül castigo alinoic nüt. Pero icona leriowan wüx isoetiün, ngome apmeamban tiül aaga xeyay ngo majneaj quiaj. Atquiaj apmarang Teat Dios. ²⁹Naleaing icona ngome áagan meyariün andeac Teat Cristo, at netam memongochiün ngo majneaj wüx minüt nej. ³⁰Tanaámb tengual memongochiün atnej tamongochiüs wüx tajlүйiüs niüng ijlүйiün; nganүй aton temenguiayiün nguineay teanamongoch.

Teat Cristo tajüic atnej ngo membeat, ndójwüx tembeat

2 Teat Cristo üüch icon mbixiüm imeajtsan; nej ambeol icon üüch majneaj imeajtsan cos andiüm icon; aton Nangaj Espiritu üüch icon mejlүйiün nóiquian. Lamejawan nguineay mimonajneaj Teat Cristo cos ajiür icon lasta. ²Pares netam meajchiün mapac ximeaats. Atquiaj apmajlүй sitiül apmejlүйiün noic nej imeajtsan merjiüran monajneaj nop alinop, aton mejlүйiün nóiquian wüx cuajantanej. ³Wüx irangan cuajantanej, nde merangan para mexoman wüx alcuane, tengwүй merangrangayon wüx; ngwүй irangan najneaj, nde merlomboochayon wüx. Meáwan inopnpon ich mayaag nej ngome alwüx atam. ⁴Nejinguind nde mayamb wüxan nej majlүй najneaj, ngwүй ich mayamb aton nguineay alndom meáwan majlүйiw najneaj. ⁵Netam meyajcan tiül imeajtsan atnej Teat Cristo aton tayaag tiül omeaats nej. ⁶Masey Dios nej,

ngome tapac wüx mapiüng nej ngondom masüüd macueat majlүй atnej ajlүй Teat Dios. ⁷Tacueat meáwan leaw tajiür tiül cielo; tiün majlүй atnej nop nerang minajiüt nipilan wüx tiün wijquiam wüx iüt cam marang nipilan. ⁸Wüx tajlүй atnej nipilan, nej ngome telombojchay; tarang najneajay atnej andiüm Teat Dios; tiün mandeow wüx cruz, masey xeyay monxing tamongoch. ⁹Pares Teat Dios tüüch nej majlүй más natang wüx meáwan leaw almajlүй, meáwan montangtang monajiüt tangejriw omaliw teombas nej; at tüüch nej minüt nej najneajay tiül meáwan minüteran leaw almajlүй. ¹⁰Cos wüxan apmanguiaiw minüt Teat Jesús apmaquiejliw micosüw nejw marangüw casa minüt nej meáwan monlүй tiül cielo, meáwan monlүй wüx iüt, at meáwan ajcüw aliw tiüt landeowüw. ¹¹Quiaj meáwan nipilan apmapiüngüw Teat Jesucristo natang tiül meáwan almajlүй, quiaj apmarangüch casa Teat Dios.

Minipilan Teat Cristo ajlүйiw atnej ran ningүй wüx iüt

¹²Nganүй xecojow xechijquiw, tilүй nüt tilүй ores wüx sal ninguiaj naquiüb icon, terangan najneaj atnej tasajas icon. Nganүй wüx lango najlүй cos sal miünquiaj, sandiüm najaw merangan alwüx alquiriw. Netam mejawan wüx, nde tegүй ndrom imeajtsan nguineay laáw isoetiün. ¹³Cos Teat Dios ambeol icon meáwan nüt, nej üüch mendiüman merangan najneaj atnej andiüm nej.

¹⁴Meáwan leaw irangan, irangan najneaj, ngo metam majlüy wüx mondeac, tengwüy moncüy. ¹⁵Quiaj nejinguin ngondom mapiüng ngo merangan palan. Netam merangan najneaj, cos icona micual icon Teat Dios masey ijlüyiün tiül nipilan monrang ngo majneaj. Quiaj alndom majüic at icon ran para membeolan meáwan nipilan wüx aaga iüt cam, ¹⁶mesajan wüx meáwan nipilan nguineay alndom mawüw wüx asoeti. Wüx aag ayaj apmapac ximeats xeyay wüx nüt aliüc Teat Cristo, cos quiaj apmajüic ngome tembachayos miün sapac, aton ngome tarangrangas miün najiüt tiül icona. ¹⁷Masey netam maw xequej nandeow nambich napalüch erchechiün, meajchiün Teat Dios ajcan lanambeol icon menguiayiün andeac nej. Wüx aag ayaj ngo mamix ximeats, apac ximeats nóiquian naquiiüb icon. ¹⁸At aton icona ich mapac imeajtsan nóiquian mequiiüjpan xic.

Timoteo y Epafrodito

¹⁹Sitiül Teat Jesús mandium, xique tenguial nandium nüüch mamb Timoteo najen majaw icon, para mapac ximeats wüx apmandilil masaj xic cuane terangan. ²⁰Cos ngo majlüy alinop mandium mayac wüx omeats mambeol icon atnej arang teat Timoteo. ²¹Meáwan ayambüw leaw nejíwan quiaj andiümüw marangüw, ngo mayambüw leaw andiüm Teat Cristo Jesús. ²²Icona lamejawan nguineay arang Timoteo; xeyay najneaj arang cos ambeol xic wüx minajiüt Teat Dios atnej nop

nacualaran ambeol miteat nej. ²³Tenguial napiüng sanüüch mamb majaw icon, wüx landoj najaw nguineay sanajlüy ningüy. ²⁴Sajaw Teat Jesús apmambeol xic aton namb najaw icon najen.

²⁵Tapiüngas netam nüüch mandilil andüy niüng ijlüyiün michijquiaats Epafrodito, aag ayaj icona teajchiün miün mambeol xic wüx meáwan leawa netam. Tembeolasayon xeyay atnej arangüw tiül soldados. ²⁶Sajaw xeyay andiüm mamb majaw icon, xeyay leaaw omeats icon. Ninguinüt tenguiaiüün niün andeow. ²⁷Naleaing tiün andeow, tajlüy mandeow. Apmandeow jondot Teat Dios ngo majüiüch mimonajneaj nej wüx nej, at wüx xique, cos apmamix ximeats xeyay, ngome quiriw. ²⁸Wüx aag ayaj ayac xic wüx nüüch mamb majaw icon najen, müüch mapac imeajtsan wüx apmejawan alinomb; ata xique lango mamix ximeats xeyay. ²⁹Nganüy ich mapac imeajtsan wüx apmengochiün, cos arang najiüt ocueaj Teat Dios. At ich mapac imeajtsan mejawan meáwan monrang najneaj atnej nej arang. ³⁰Cos wüx minajiüt Teat Cristo tajlüy mandeow. Nej ngo mapiüng wüx, masey mandeow cos nind mambeol xic, cos icona ngondom mewiünan membeolan xic.

Néjan quiaj Teat Cristo alndom mawün asoetiüts

3 Nganüy xecojow xechijquaw, sanasaj icon alinomb, ich mapac imeajtsan wüx Teat Jesús. Xique ngo paxiüm narang wüx

nawiig alinomb leaw landoj
 lanasaj icon, cos sawaw aag ayaj
 netam menguiayiün; quiaj ngome
 apmechiwean imeajtsan wüx aaga
 landoj menguiayiün. ²Netam
 mepacan wüx ajcüwa nipilan
 leaw arangüw ngo majneaj, at
 nejiw pet. Cos ngo maquiajchiw
 atnej apiüng Teat Dios; apiüngüw
 nejiw arangüw atnej apiüng Teat
 Dios ajcan ajlüyiwiw circuncidado.
³Icootsa lajlüyiiüts tiül minipilan
 Teat Dios cos ayambaats Teat
 Dios, ngome cos ajlüyiiüts
 circuncidado. Nangaj Espiritu
 ambeol icoots mandiümaats Teat
 Dios; üüch mapac omeajtsaats cos
 ajlüyiiüts ocueaj icoots Teat Cristo
 Jesús. Icootsa ngo mayajcaats
 más netam cuajantanej leaw
 alndom marangaats icóotsan
 quiaj. ⁴Sitiülme aljane alndom
 mapiüng nembeat leawa tarang,
 ndot aag apmambaran wüx,
 xique najntsopiüs tiül. ⁵Cos
 xique tajlüyiüs circuncidado wüx
 tajiüras ojpeacüw nüt. Xique
 nacualaranas tiül cambaj Israel,
 nawas tiül acualaats Benjamín.
 Xeteatiün palüyan hebreo nejiw,
 at a xique. Tajlüyiüs tiül noic
 ajlüy nipilan nasoiquiwiw fariseos,
 leaw xowüy andüjpiw aaga poch
 tüünd Moisés. ⁶Tapacas wüx
 xeyay leaw taquiaachasan, cos
 tayambas ombasüw minipilan
 Teat Cristo. Tarangas meáwan
 palan atnej apiüng tiül aaga poch
 tüünd Moisés; ngo majlüy cuane
 alndom nasoic wüx. ⁷Pero meáwan
 leawa tarangas quiaj, leawa
 tayajcas nembeat xeyay, nganüy
 sapiüng ngo membeat nicuajind,

cos nganüy sandiüm Teat Cristo.
⁸Naleaing meáwan leaw tarangas
 nomb, nganüy lango membeat
 nicuajind najaw. Leaw sarang
 nganüy aag ayaj xeyay nembeat
 cos teanandüüb Teat Cristo Jesús
 Xeteat Dios. Ajcan sandiüüb Teat
 Cristo lanacueat meáwan leawa
 tajiüras nomb, at leawa tarangas.
 Lanawiich ninguiün aag ayaj
 atnej nendeajndeaj. Nganüy leaw
 xeyay sandiüm, aag ayaj naxom
 monajneaj wüx ombas Teat Cristo,
⁹najlüy nóiquian naquiiüb. Nganüy
 Teat Dios lamawün sasoet wüx
 tarangas apiüng Teat Cristo, ngome
 wüx sarang apiüng tiül aaga poch
 tüünd Moisés. Cos aaga awaran
 wüx quiaj, Teat Dios tarang wüx
 tujchiüs ximeaaats Teat Cristo.
¹⁰Nganüy leaw sandiüm, najaw
 xeyay wüx Teat Cristo, y nayaag
 tiül ximeaaats guineay Teat Dios
 tapacüüch nej tiül mondeow.
 Sandiüm naquiiüb wüx namongoch
 atnej nej tamongoch, masey
 nandeow atnej tandeow. ¹¹Nganüy
 leawa teanacül, matüch a nüt
 mapacaran tiül mondeow.

Netam marangaats leaw niüng alndom

¹²Xique ngo napiüng lanatüch
 meáwan aag ayaj, at ngo napiüng
 lanarang palan; ngwüy xique
 sandiüm sitiül alndom natüch
 narang leaw apaj xic wüx Teat
 Cristo. Cos tawün xic wüx para
 najlüy micual nej. ¹³Xecojow
 xechijquiaw, xique ngondom
 napiüng lanapalüch leaw niüng
 netam natüch. Ngwüy, leawa xique
 sarang, aag ayaj ndrom ximeaaats

leawa lamong; sayac ximeaats wüx leaw aliüc miün, ¹⁴para alndom natüch niüng netam natüch. Cos quiaj sanüünd aaga najneajay leaw apmüüch icoots Teat Dios tiül cielo wüx ajlüyiiüts nóiquian maquiüjpaats Teat Cristo.

¹⁵Meáwan icootsa leawa latangaats wüx aaga leawa Teat Dios lamüüch icoots majawaats, netam mayajcaats atquiaj aton. Nganiy sitiül aljane ayaag alinoic tiül aaga les ndot napiüng quiaj, Teat Dios apmüüch maxom omeaats wüx aag ayaj. ¹⁶Pares netam mandüjpüüts leawa niüng lamanguaiyiiüts wüx Teat Cristo.

¹⁷Xecojow xechijquaw, indüjpiün wüx leawa sarang. At leaw ijawan arangüw atnej sarangan, indüjpiün wüx aton. ¹⁸Cos almajlüy xeyay leaw apiüngüw arangüw leaw andiüm Teat Cristo, pero naleaing ajcüyiw majawüw Teat Cristo, aag tandeow wüx cruz mawün asoetiiüts. Lanasaj icon xeyay wüx ajcüw ayaj, y nganiy sajiünts wüx nasaj icon alinomb. ¹⁹Alinoic nüt ajcüw ayaj apmambüw tiül castigo cos pálwüx arangüw, áagan leaw andiümüw marangüw; ayacüw aag ayaj atnej midiosüw nejiw. At leawa netam maxinguiaw wüx, aag ayaj arangrangayej wüx. Nejiw a nipilan quiaj palüy miün ayacüw omeajtsüw wüx leawa najlüy ningüy wüx iüt cam. ²⁰Pero icootsa, micambajaats ajlüy tiül cielo. Imiün quiaj teamacüliüts mapeay Miteatiiüts Jesucristo, aaga newün icoots wüx asoetiiüts. ²¹Wüx nej aliüc, quiaj apmangowüüch micuerpojaats cam leaw ngo

membeat; apmajiüraats alinoic najneajay atnej micuerpo nej. Cos nej alndom marang ayaj, atnej arang wüx cuajantanej leaw almajlüy.

Meáwan nüt ich mapac imeajtsan wüx Teat Cristo

4 Xecojow xechijquaw, xowüy apac ximeaats wüx icona, xeyay sandiüm najaw icon. Meáwan nüt apac ximeaats wüx icona, cos wüx icona saxom sarang xenajiüt. Nganiy sandiüm tanaámb mapac imeajtsan wüx Teat Jesús, nde mecueatiün.

²Sandiüm nasajüw müm Evodia at müm Síntique majlüyiw nóiquian wüx Teat Cristo, macueatiw ajcüycüyiw. ³Átan sandiüm nasaj ic xechiig, imbeolüw ajcüwa montaj quiaj, cos nejiw naleaing tambeolüw xic xeyay wüx tarangas minajiüt Teat Dios maquiüjpüw xechiig Clemente, y alacas leawa tambeolüw xic. Minütiw nejiw altiül aaga nawiig niüng ajmel minüt leaw apmapaciw meáwan nüt tiül cielo.

⁴Ich mapac imeajtsan meáwan nüt wüx Teat Cristo. Sasaj icon alinomb ich mapac imeajtsan. ⁵At nde mejcüyiün najen, ijüiquichan ijiüran lasta; atquiaj alndom majaw meáwan nipilan guineay irangan najneaj. Teat Jesús laliüc mandilil.

⁶Nde meyacan wüx imeajtsan alcuane naél leaw ijlüyiün tiül; aleáingan itüniün ocueaj Teat Dios leawa indiüman metüniün; y wüx itüniün isajan Teat Dios apac imeajtsan wüx leaw ixoman. ⁷Quiaj Teat Dios apmüüch majneaj

imeajtsan leawa nejingund wüx cambajiüt ngondom maxom omeaats wüx. Aaga monajneaj quiaj apmambeol icon wüx leawa iyajcan tiül imeajtsan, at apmüüch mexoman imeajtsan cos ijläyüün nóiquian mequiüjpan Teat Cristo Jesús.

Iyacan imeajtsan wüx leawa najneaj

⁸Xecojow xechijquiaw, sandondoch leaw sandiüm nasaj icon. Iyacan imeajtsan wüx meáwan leawa naleaing, leawa najneaj majaraw, leawa najneaj marangüch atnej netam, leawa palüyan najneaj, leawa najneajay nandiüram, leawa najneaj anderac wüx. Meáwan cuajantanej leawa najneaj, leaw alndom marangüch casa, wüx aag ayaj iyacan imeajtsan.

⁹Leawa taquiajchiüs icon at leaw teyariün, leaw tenguiayüün, aton leaw tejawan nguineay sarang, atquiaj irangan. Quiaj Teat Dios, aaga neech monajneaj apmajlüy maquiüüb icon.

**Hermanos monaw tiül cambaj
Filipos ambeolüw a Pablo**

¹⁰Nganüy xeyay apac ximeaats sarang casa Teat Dios, cos saw icona laleaaw imeajtsan wüx xique alinomb. Ngome teanapiüng nómban ndrot imeajtsan xic, cos tajawas ngondom membeolan xic masey tendiüman. ¹¹Xique ngo nasaj icon aag ayaj ajcan ngo najiür; ngwüy, cos lasap ximbas wüx leaw alnajiür. ¹²Lanajaw nguineay alndom namongoch, masey ngo najiür nicuajind, tengwüy masey sajiür xeyay. Cuajantanej majngot,

xique lanajaw nguineay sanarang, masey netiüs paxiün, tengwüy ngo naxom nicuajind; masey sajiür xeyay, tengwüy masey ngo najiür nicuajind. ¹³Cuajantanej alndom namongoch, cos Teat Cristo ambeol xic, üüch xic sapac. ¹⁴Masey atquiaj ajlüy, icon najneaj terangan cos tembeolan xic wüx samong tiül naél.

¹⁵Icona monaw Filipos, icoyónan quiaj lamejawan nguineay tembeolan xic wüx tawas ninguij tiül Macedonia; tamelichas nasaj wüx nipilan nguineay tandeow Teat Cristo mawün asoeteran. Icónan quiaj tiül Filipos teajchiün xic tomiün membeolan xic wüx aaga najiüt sarang. ¹⁶At wüx tajläyüüs tiül cambaj Tesalónica, teajchiün mamb tomiün nomb iwic, meajchiün xic leawa netam. ¹⁷Xique ngo namb wüx sitiül alndom meajchiün xic alcuane; ngwüy, cos xique sandiüm najaw mexoman wüx xeyay leaw irangan quiaj ninguiün tiül cielo. ¹⁸Meáwan leaw teajchiün miün lapeay tiül xiwix, tüüch xic teat Epafrodito. Nganüy lamong wüx alnajiür. Leaw teajchiün xic, aag ayaj atnej najmboc angan pom, atnej noic najneaj nichech leawa Teat Dios najneajay majaw. ¹⁹Midiosaats apmüüch icon meáwan leaw ngo mejiüran, cos Teat Cristo ajiür xeyay cuajantanej tiül cielo. ²⁰Miteatiüts Dios netam marangüch casa meáwan nüt ngo majiür ümb.

Ndójwüx atepeay

²¹Itepeayiün quiaj meáwan minipilan Teat Cristo Jesús.

Atepeayiw icon meáwan
minipilan Teat Cristo leawa aliw
ningüy naquiüjpüw. ²²Ningüy
meáwan monyar andeac Teat
Cristo atepeayiw icon, aton
andiümüw matepeayiw icon

xeyay ajcüwa monlüy aniüng a
César, natang nenajiüt ningüy tiül
Roma.

²³Tanaámb mambeol icon
Miteatiiüts Jesucristo, müüch icon
mimonajneaj nej. Amén.